


Nozibele no fuuk tolu



 Tessa Welch

 Wiehan de Jager

 Aurelio da Costa

 3

 Tetun



Tempu uluk liu ba, labarik fetu nain tolu ba hili ai.



Loron ne'e manas ho nune'e sira ba iha mota atu nani. Sira halimar no nani no kari bee ba malu iha bee laran.



Derepente, sira realiza katak tarde ona. Sira la'o fila lalais ba suku.



Bainhira sira besik uma, Nozibele hasa'e ninia liman ba ninia kakorok. Nia haluha tiha ona ninia korrente! "Favor mai fali ho ha'u!" Nia husu ba ninia belun. Maibé ninia belun sira dehan ne'e tarde loos ona.



Ho nune'e Nozibele mesak mak ba fali mota mesak.
Nia hetan ninia korrente no halai fila ba uma. Maibé
nia lakon iha nakukun laran.



Husi dook nia haree naroman mai husi uma du'ut
ida. Nia halai ba ne'eba no dere odamatan.



Ba ninia surpriza, asu ida mak loke odamatan no dehan "Saida mak o hakarak?" "Ha'u lakon no ha'u presija fatin ida atu toba, "Nozibele hateten. "Tama mai, se lae ha'u sei tata o!" asu ne'e dehan. Entaun Nozibele tama ba laran.



Depois asu ne'e dehan, "Te'in ba ha'u!" "maibé ha'u nunka te'in ba asu ida antes," nia responde. "Te'in, se lae ha'u sei tata o!" Asu ne'e dehan. Ho nune'e Nozibele te'in hahán balun ba asu ne'e.



Depois asu ne'e dehan, "Prepara ha'u nia toba fatin!" Nozibele hatan, "Ha'u nunca prepara toba fatin ida ba asu ida." Prepara fatin ne'e, se lae ha'u sei tata o!" Asu ne'e dehan. Ho nune'e Nozibele prepara fatin toba ne'e.



Loron loron nia tenke te'in no dasa rai no fó hariis asu ne'e. Hafoin loron ida asu ne'e dehan, "Nozibele, ohin loron ha'u tenke vizita kolega sira balun. Dasa uma laran, te'in hahán no fase ha'u nia sasán molok ha'u fila."



Iha kedas momentu asu ne'e ba, Nozibele foti fuuk tolu husi ninia ulun. Nia tau fuuk ida iha kama okos, ida seluk iha odamatan kotuk no seluk ida iha Kraal (kraal= uma du'ut tradisional Afrika nian). Hafoin nia halai maka'as fila ba uma.



Bainhira asu ne'e fila mai, nia buka Nozibele.

"Nozibele, o iha ne'ebé?" Nia hakilar. "Ha'u iha ne'e, iha kama okos," fuuk primeiru hatan. "Ha'u iha ne'e, iha odamatan kotuk," fuuk segundu hatan. "Ha'u iha ne'e, iha kraal," fuuk terseiru hatan.



Depois asu ne'e hatene katak Nozibele lohi tiha ona
nia. Entaun nia halai no halai ba iha suku. Maibé
Nozibele ninia maun sira hein nia ho ai-sanak tolu.
Asu ne'e fila no halai no nunka haree hetan dezde
momentu ne'e.




Global Storybooks

globalstorybooks.net

Nozibele no fuuk tolu

 Tessa Welch

 Wiehan de Jager

 Aurelio da Costa

